



Шормо эл, норумук да рун бер!

6-шо (3342) №,
2018 ий 10 февраль,
шуматкече.

ЯМДЕ ЛИЙ

1933 ий 1 февраль годсек лектеш.

0+



85 ияш лүмгече дене саламлена!!!

Морко йоча книгагудо ден «Ямде лий» газет шуко жап йолташ улына. Морко кундем гыч савыкталтше кажне уверым эскерена. Йоча книгагудын пашаже нергенат шуко гана газетын лаштыкштыже возалтын. Кужу-кужу ўмыран лийза, мемнан семнак шуко-шуко лудшыда лийже!



Тиде номерысе кажне лаштыкыште «85»-ан цифрым шылтен улына. Кычалза. Кө эн шуко муэш – пөлек.

85

«Ямде лийын» почтыжо

Арнясе ойыртемалтше серыш Аделина ден Ариадна Тимковамытын. «Эн пиалан серыш» рубриkyш пуртенна. Ёдыр-влаклан фотосо книгам пөлеклена.



2018 ий - Добровольцевын (волонтерын) идалыкше

Йоча ушемна

Шүргыял школыштына «Рвезе тукым» йоча ушем пашам ышта. Дружиныште – 23 тунемше. Кажныже республикысе «Эрвий» СДПО-н кум тўсан галстукшым нумалеш. Дружиным Анатолий Александров вуйлата, тудлан Клавдия Игнатьева польшыкала.

Шукерте огыл «Мыйын отрядем – мыйын куанем» тагасымаш эртен. Отряд командир, барабанщик, вожатый-влак шке коклаштышт эн чулымжым ойыренят. 9-ше классын тунемшыже-влак волонтер семын пашам ыштеныт. Сенгышыш «Неугомон» отряд лектын.

Е.В.ГРИГОРЬЕВА,
вожатый.

Морко район.

Мо тыгай пиал?

Урокышто пиал нерген ойлымашым лудна. Муныктышына Людмила Анатольевна пиал мутым ешыштына кузе улылылым пален налаш шўдыш. Шведе мом пален нална: авай ден ачай каласышт: «Пиал – тиде кунам чыланат эсентаза улына». Алина акана: «Кунам шокшын качым йоратет, а тудо тыйым ужын йывырта». Алёша изана ден Арсений шольыналан шергакан модыш машинам налын пуат гын, пиалан лийыт. А мыланна пиал – тиде «4» да «5»-лан гына тунемаш. А тыланда мо тыгай пиал? Аделина ден Ариадна ТИМКОВАМЫТ,
2-шо класс.

Одо кундем, Алнаш, Одо.

Артист гай кертыт



Школыштына кажне ийын «Лучики солнца» конкурсым эрта-рена. Ты гана руш але марий произведенийым модын ончыкташ кўлын. 2-шо классыште тунемше-влак С.Михалковын «А что у вас?» почеламутшо почеш сценкым кельштареныт **(снимкыште)**.

М.Е.Салтыков-Щедринын «Как мужик двух генералов прокормил» повестьше почеш 7-ше класс онга сценкым ямды-



лен. Нуно сенгышыш лектыныт.

Кристина БЫКОВА, 9-ше класс.
Кужэгер, Конганур.

Перрон йомакше

Школыштына Шарль Перрон йомакше почеш викторине эртаралтын. Ме тушто да йодыш-влаклан вашмутым кычална. Мый эн шуко жетоным погана да сенгышыш лектынам. Тўналтыш класслаште тунемше-влак писатель нерген пырдыжгазетым луктыныт. Тыгай сай пайремым библиотекарь Л.А.Семенова ямдылен.

Валентина ИШИМОВА.
Татарстан, Агрыз, Пелемеш.

Уверлан уло вер

«Гринландия» авторский муро Всероссийский фестиваль тений «Люблю тебя, моя Россия!» девиз дене эрта. Сенгыше-влак 19-22 июльышто Киров кундемыште погынат.

85

Кечышотым эскере

12-18 февраль - Ёярня арня. Ожно арня мучко унала коштын-ныт, мелнам кўэштыныт, муреныт, куштеныт, курык гыч мунчалтеныт. Рушарнян Ёярня дене чеверласеныт.

15 февраль - Воин-интернационалист-влакым шарныме кече. 1989 ийыште лач ты кечын совет войска-нытаргыш колоннажо Афганистан гыч лектын. Йот мландысе сарыште Марий Эл гыч 3 тўжем утла салтак порысым шуктен.

85

Тунемшын портфельже

могай нелытан лийшаш?

Йодышлан Йошкар-Олан

прокуроржын алмаштышыже В.С.ПТИЦЫН вашешта:

- СанПиН темлымыж почеш 1-4-ше класслаште тунемше-влакын яра портфельышт 700 грамм нелытан лийшаш. 1-2-шо класслаче йочан портфельже тунемме арвер да учебник-влак дене пырля 1,5 кг деч нелырак лийшаш огыл. 3-4-ше класслаште - 2 кг; 5-6-шо класслаште - 2,5 кг наре; 7-8-ше класслаште - 3,5 кг; 9-11-ше класслаште 4 кг нелытан лийшаш.



Айста курчакым ыштена!

Тыгай йоча писатель Сергей Михалковын шочмыжлан тений 105 ий, а Алексей Толстойын шочмыжлан 135 ий темеш. Корней Чуковскийын «Мойдодыр» да «Тараканище» почеламутшо-влакым савыктымылан - 95 ий. Нине юбилей вашеш Республикысе курчак театр «В гостях у сказки» йоча кидпаша конкурсым увертара.

Увер выр-выр

10 февральыште «Российын ечыгорныжо» эрта. Кугурак ийоган-влак лу, изирак-влак вич менгыш куржыт. Старт - 12 шагатлан.

12 февраль - Коҥга пайрем.

Тўшак йлбалне чинче падыраш.

17 февральыште Йошкар-Олаште «Ёярня курык» фолк-фестиваль эрта. Тутло мелна конкурс лиеш.

Мланде ден кава родо улыт.

Куэ укин лывырга гын, игече лывырта.

Россий писатель-влак ушемын Марий Элысе пўлкаже йоча-влаклан «Сылыныт алмаштыш» усталык конкурсым увертарен.



Сталинград крдалмаш 1942 ий 17 июль гыч 1943 ий 2 февраль марте шуйнен. Кугу Отечественный сарын эн кугу крдалмашыжлан шотлалтеш. Совет салтак-влак 1,5 миллион тушманым пытареныт. Тиде сенымашлан тений 75 ий темын.

Сталинград сенымашым таптен

3 февральыште Йошкар-Олаште да Волжскышто «Сталинград крдалмаш» всероссийский исторический квест эртен. Тушко 270 школьник ден студент ушнен. Национальный президент школ-интернатыште эртыше квестыште индеш школ да кум вуз гыч команде-влак тагасеныт.

– Ме носилкам ыштенна да «сусыргышо» йолташнам нумал куржынна, йук почеш боевой техникым палаш тыршенна, шифр-влакым кычалынна, – каласкала президент школ-интернатын тунемшыже Ксения Тихонова. – Киднам кылденит, а ме кагаз гыч самолётым ыштенна, южыш колтенна – пеш онай ыле.

Сталинград верч крдалмаште лийше салтак-влак кокла гыч Марий Эл-ыште кандашын гына кодыныт. Нунылан Марий Эл Вуйлатыше А.А.Евстифеев саламлы-машым колтен.

С.Г.Чавайн лумеш национальный библиотекуште «Эхо Сталинграда. Страны мира и победа на Волге» выставке почылтын. Российысе внешний политике архивыште аралалтше документ-влак ончыкталтыт.

Квест годым.

Л.СЕМЕНОВА ямдылен.

Палыза

Йоча-влак, Шочмо Элым аралышын кечыже вашеш саламлы-машдам колтыза. Уло кумылын савыктена.

Кочайым муыныт

Шучко сар шкеж нерген кызытат шарныкта. Марий Элысе поисковый отряд-влак пеш сай сомылым шуктат: колышо салтак-влакым кычалыт. Увер деч посна йомшо Иван кочайым Смоленский областьыште кычал муыныт. 2016 ий 6 июньышто салтакым шочмо мландешыже тойышна.

Вика МИХАЙЛОВА.

Морко, Кожлаер.

Кугешнем

Мыйын тукмыштем пörьен-влак чылан элнам араленыт. Кугезе чүчүэм Михаил Васильевич Лебедев – Совет Ушем Герой. Кочам воин-интернационалыштын порышым Венгрийыште шуктен. Ачам армийыште ракетный войскаште служитлен. Саша изам ик ий ончыч армий гыч тольо. Тудо танковый войскаште служитлен.


Алексей ЛЕБЕДЕВ.

У Торъял, Немда.



Эн патыр армий

23 январьыште Советский район Орша тун школышто военно-патриотический воспитанийлан пöлеклалтше кече-влак тунгалтышым налыч. Класс шагат годым тунемше-



Дима ХАЛТУРИНЫН сүретше.

влак Герой-Ленинград нерген презентацийым онченит. Пален налыныт, тушто илыше-влак кузе сар пагытым чытен лектыныт, шукушшт шужен коленыт.

«Мемнан армий эн патыр» сүрет конкурсышто Дима Халтурин (7-ше кл.), Андрей Репин (5-ше кл.), Кирилл Кошкин (3-шо кл.) ойыртемалтыныт. Труд урокым вүдышö Юрий Петрович Нагаев 1-4-ше класслаште тунемше-влак коклаште «А ну-ка, рвезе-влак!» тагасымашым эртарен. Пеш келшен!

Р.Г.АНТРОПОВА, туныктышо.



Саламлена!

Вашке 23 февраль толын шуэш. Тиде кечын ме армий радамыште служитлыше да тынысым аралыше пörьен-влакым саламлена. Нунылан пенгыде тазалыкым, кужу ўмырым, чытышым да пиалым тыланена.

Диана АЛЕКСАНДРОВА. Морко, Эгерсола.

Пагалыме йолташ-влак!

«Ямде лий» газетын пашаенже, ветеранже да лудшыжо-влакым кугу юбилей – икымше номерже лекмылан 85 ий темме дене – шокшын саламлем.

Печатлалтше йоча изданий тачысе кечынат эн поро сомылым шуктен шога – ўдыр-рвезе-влакым порылыклан да усталыклан тунукта. Редколлегий эн тўн верыш шочмо йылмым перегыме йодышым шында, да газет ятыр ий марий йылме дене савыкталтеш – тидыжак моткоч шергакан.

Газетын творческий коллективше ончыкыжат национальный йоча изданийын поро йўлажым аралаш тўналеш, образований, просветительстве дене кылдалтше да поро кумылым ончыктышо проектлашке ушна манын ўшанем.

«Ямде лий» газетын пашаенже-влаклан кумыл нўлтаттым, у шонымашым, онай да тўрлў йодышым тарватыше материал-влакым ямдылаш да шуко лудшо-влакым тыланен кодам. Республикысе СМИ-влак коклаште газет тек сай деч сайже семын ойыртмалтеш, йоча-влаклан веле огыл, а шуко лудшылан келшыше лиеш.

Марий Эл Вуйлатыше А.А.Евстифеев.

Лўмгечылан пўлеклалтше пайрем 1 февральыште Йоча тоштер-ончер рўдерыште эртен.

Марий Эл Кугыжаныш Погын председателынь алмаштышыже А.Н.Иванов РФ Кугыжаныш Думын депутатыше С.Ю.Солнцеван лўмжў дене Йошкар-Оласе 7-ше номеран школышто тўналтыш класслаште тунуктышо И.В.Закиевалан Таумутым кучыктен.



Марий Элын калык поэтше Г.Сабанцев В.Исенекоев лўмеш премийым сулышо Морко районысо Коркатово лицейын юнкор кружокшымы саламлен.



Марий радион службо вуйлатышыже В.А.Кольцов Марий Турек район Сардаял школын тунемшыже Юлианна Ермолаевалан З.Яковлева лўмеш премийым кучыктен.



Поэтессе З.Дудина Юля Ивановам (Кужэгер, Шорсола) Антонов Ивук лўмеш премийым налмыж дене саламлен.



Национальный президент интернат-школын 4-ше классыштыже тунемше-влак.



Полина Корчагина, «Ямде лийым» саламлен, сылне почеламутым лудын. Полина школ-интернатыш тунемаш Шернур район Полдыран ялгыч толын.



Йошкар-Ола гыч
изак-шўжарак Тихон
(28-ше лицей, 2-шо кл.)
ден Кира (90-ше йоча-
сад) Армяковамыт.



85



Т. Евсеев
лүмеш На-
циональный
тоштерыш
вуйлатыше
Л. Н. Смир-
нова (күш-
нө) да Йоча
тоштер-ончер рүдер вуйла-
тыше И.Г.Губанова.




Саламлем

Ик секретым каласем,
Мый лудаш пеш йоратем.
А эн сайже – «Ямде лий»!
Кид йымалнемак тый лий.

Тыште уло чылажат:
Ребус, ойлымаш, йомак,
Түрлө вер гыч уверат,
Ой-кагаш да такмакат.

«Ямде лийым»
мый лудам,
Лаштыкклажым
шергалам.
Гол, йолташ,
пырля лудаш,
Уш-акылым
пойдараш.

Уло мыйын
вес секрет:
Вет йоратыме
газет
Кужу ўмырым
илишаш,
Калыкнам
куандараш.



Анна ЕРОСЛАНОВА,
2-шо «Б» класс,
Л.В.МОЧАЕВА,
юнкор кружок
вуйлатыше.
У Торъял школ.

Параньга район Усола ялын шоч-
шыжо Ваня Ендубаев мурсем пөле-
кым ыштен: баян дене шоктен. Рвезе
Национальный президент сымыктыш
школышто 4-ше классыште тунемеш.



2018 ийын озаже –
Нарынче пий – унала толын.



85

Коллегына-влак саламленыт. «Ший
памаш» сылнымут фондын (вуйлаты-
ше – писатель В.В.Краснов) пөлек-
шым «Ончыко» журналын тўн
редакторжо И.Г.Попов кучыктен.



Е.Я.Егоркина, Н.Семенова, Ф.Лебедева,
Л.Григорьева, А.Эманова, Л.Семенова, Г.Сабанцев.



Пайремым
вўдышө-влак Егор Фёдоров
(Йошкар-Ола, 14-ше №-ан гим-
назий) ден Надя Герасимовалан (7-
ше №-ан шк.), «Ошма шагат» мастер-
скойым вуйлатыше
Н.Рукавишниковалан кугу тау.



Пушок лўман пырысигына уло. Мый тудым пукшем, модыктем. Шукерте огыл пинеге шочо. Тудлан Тарзан лўмым пуышна. Пушок ден Тарзан пырля модаш тўналгыч. Мый тидлан моткоч куанышым.

Эдита АНДРЕЕВА.
Параньга, Матародо.

Ливерпуль

гыч медик-влакын шымлымшты почеш, шке койыш-шоктышым кучен кертдыме да тыгак шонгырак-влакым пий чўчыкдынрак пурлеш. Пўрєнг-влак ўмбакаш пий-шамыч 1,8 пачаш шуырак кержалтыт.

Банзай

Мыйын Банзай пием уло. Лўмым ачам пуэн. Ачам тудым сонарыш кош-таш налын. Но Банзай чодыраш кошташ ала-молан лўдеш. Ачам ойла: «Пырым ужеш гын, очыни, вик вуйышкем кўзен шинчеш дыр!»

Банзай – пеш поро, онай пий. Капше кугу гынат, модаш йўрата. Тўсшў ошо, йолжо кадыр. Банзай дене саламлатат гын, тудо тыланет йолжым пуа. Школ гыч толмем коридорышто вуча. Уж-мекше тўрштылеш, мыйым нулаш толаша. Вара коктын уремыште модына.

Екатерина БОРОВИКОВА,
5-ше «А» класс.
Йошкар-Ола, 1-ше номеран школ.

Палаш онай

Имне кокла шот дене 20-25 ий, ушкал 20-35 ий наре, ўшкыж 15-20 ий илат.



Мемнан уло пырысиге, Йўрата ўмбалым, шўрым.
«Коля кучаш кай», – манам,
Мыйын шинчаш вел онча.

Алексей АНИСИМОВ.

1-ше номеран Морко школ.

85

Ням-ням, Няфка



Мемнан суртышто Персик пырыс, Арчи попугай, Симба сухопутный улитке да аквариумышто шуко кол улыт. Но таче мый Няфка черепахе нерген возынем. Тиде черепахым сайын тунеммемлан авам пўлеклен. Няфкалан кум ий эртен. Тудын панцирьже пеш мотор, кўчшў пеш кужу. Эше изи почшо уло.

Мый кенезым Няфкалан клевырым, кешырым да шўршудын лышташыжым пукшем. Няфка тыгай изи, но пырыс деч огеш лўд!

Мария МИЛЮТИНА,
3-шо класс.
Шернур, Койсола.



85

Ожно нўогам шепкаш пыштыме деч ончыч шем тўсан пырысым пыштеныт. Аза ласкан малаш тўналеш шоненыт.



Арслан СМИРНОВЫН сўретше.
Медведево, Руэм.

Айда пырля, сур шоншо!

Чу, пинегем ала-мом муын. Мый воктекеже толын ончалым – шоншо кия улмаш. Изи шоншо мемнам ужо да мундырала пўтырналте. Пинегем ўпшыч нале да чапаж дене тўкалтыш. Шоншо, тидым шижын, кудалын йомо. Пинегем ўпкелен ончен шоген кодо. А мый каласышым: «Виян ончылно кеч-кунамат вийдыме титакан».

Наталья СИДОРОВА.

Сўрал шыже толын шумек, ик кечын пўртўсыш лекташ уло чонем шупшо. Пиёмат пеленем, кадыр почшым рўзен, мераным покташ ямде. Ончен куанем: Шемечем тембалне сур шоншо дене келшен кутыра. Поро чонжо да поро кумылжо дене шкеж деке телым эртараш ўжеш.

Александра КЛИНОВА.
Татарстан, Мамадыш, Кугу Шия.

Конкурсна ўмбакеже шуйна.

«Вконтакте» соцсетъыште «Ямде лий – марла йоча газет» тўшкаште тыгай сўрет теве кўчык сылнымут пашам возен колташ йодынна ыле. Кок паша дене палдарена.



Уста сүретче

Теле пүртүс чылалан поян: мамык лумлан, чатлама йүштылан, весела пайремлан, чевер кечылан, ош упшан курыккан... Чылажым ойленат ом пытаре. Мый издер дене мунчалташ, ече дене үчашен курж-талаш йөрәтем. Йолташ, ача-ава-влак дене пырля чүчкыдын чодыраш коштына. Ош думышто янлык кыша сүретым эскерена. Теле – уста сүретче. Тудо мыланем келша.

Жанна ПИРОГОВА, 4-ше класс.

Теле

Чинче лум лумеш шыман:
Ошо-ошо, пеш кумдан.
Мланде ынде ош ужган –
Теле гоч кана ласкан.
Южгунам үштеш поран,
Толеш тале лум тўтан.
Тиде тельн юзо вийже,
Айда таче тыгак лийже!
Теве, ончо, лум чонга
Савар воктен погына.
Чу, издерым вет лукман!
Мунчалтен пикшла вол(ы)ман.
Тўтан пыта, ме чылан –
Йывыртыше кумылан –
Курык вуйыш погынен
Мунчалтена куанен.
Она вурсо, телат сай,
Лумжак вет мамык гай.
Йүштат мемнам ырыкта,
Пүртүс вийжым шарныкта.

**Кружкышто тўшкан
возымо почеламут.**

Морко, Купсола.



85

Оңай каныш

Йоча-влак теле канышым мот-коч йөрәтат. Олю шўжарем дене пырля курык гыч издер дене мунчалтенна. Моткоч оңай! Курык гыч пикшла волет – үмбакет лум шыжалтеш, чуриетым йүштө кылмыкта, а тыланет тунар весела. Теле каныш мыйын чонемлан пеш келшен.

Аня ЯКИМОВА.

У Торъял, Тошто Торъял.

Февраль тельн пудырта: поран дене вяж, лумлан поян.

Саша

изам дене каныш кечылан
ковам ден кочам деке унала миен-
на. Нунылан пум ямдылаш полшенна,

волак дене

левашыш шуп-
шыктенна. А

вара ку-
рыкышто

издер да ече

дене мунчал-
тенна. Ялыште

южшат яндар-
рак, лумжат

ошырак.

Эше

теве

тыгай

лум

пёртым

ыштенна.

Анна ЯМИДАНОВА.

Советский район.



Алыште пеш сай!

Лумжо,

ончыза, могай!

Киялта ош мамык гай.

Кайышым келге коремыш

Ече дене мунчалташ.

Курык гыч выжге водем,

Чонем дене куанем.

**Ангелина
НИКОЛАЕВА.**

Морко, Нуж-Ключ.

14 февраль – Йоратыше-влакын кечышт

**Шке кид дене
ыштыме пөлек
йолташетлан але
лишыл енетлан эн
шерге лиеш.**

Кўдыт: 12x17 да 10x15

сантиметр кугытан картон,
тыгыде шўм-влак, 30 сантиметр
кутышан атлас тасма, флома-
стер, клей.

Мемнан темлыме кышкар
почеш тыгыде шўм-влакым пўч-
кеден лук. Пеледыш семын
изирак картонеш клеитле.
Вурго ден лышташым сүретле,
тасмам кылде. Вара кугурак картонеш клей дене
пижыктен шынде. Открыткет моторрак лийже манын,
картоным тўрлө тўсаным налын кертат.



9-11-ше класслаште тунемше-влаклан тест

1. Рвезе поэт Миклай Казаков
икана Маргостеатрын сценыж гыч
«Салам» почеламутшым лудын пуэн.
Тиде стих кōлан пōлеклалтын?

А. С.Чавайнлан. **Б.** Олык Ипайлан.
В. М.Шкетанлан.

2. Икымше книган лўмжō –
«Почеламут сборник». Но автор вес
лўмым пуэн улмаш. Могайым?

А. «Первый ошкыл». **Б.** «Икымше
ошкыл». **В.** «Первый йолтошкалтыш».

3. Кўчыкэнгер ялысе школышто
М.Казаков мыняр ий тунемын?

А. Кум ий. **Б.** Ныл ий. **В.** Кок ий.

В.СМИРНОВ ямдылен.

Вашмутым 8-ше лаштыкыште
муыда.

85

КОНКУРС!

«Палыза, кө мый улам!»



Фотошто Морко район Коркатово лицейын 1-ше классыштыже тунемше Дария Кушакова.

Фото-влакым vk.com/yamde_lii тüşкаш веранденна. Сенышым тендан йүклымö почеш ойырен налына)))

31 январьыште, 1 да 2 февральыште Госавтоинспекций Йошкар-Олаште тергыме пашам эртарен. 62 йолешкын корнысо правилым пудыртымыжым пален налын. Южо водитель зебрым сүретлыман верлаште корным вончышо йолешкылан корным ок пу. Тыгай 50 фактым палемденят.



Йоча-влак, корнышто түткө лийза! Правил-влакым шарныза!

7-ше лаштыкысе тестлан вашмут: 1.А. 2.А. 3.А.

85 Йүштö сүретла

Йүштö, йүштö кугыза Шке мастаржым ончыкта. Тудо йүдым окнашкым Ош сүретым сүретлен. Ик окнаште койдалеш – Удыр лумым кышкылтеш. Теве маска папалта, Кидкопажым пеш тамла. Теве курык-влак шогат, Ошын-ошын койылдат. Ах, могай онай сүрет! Кугыза кертеш пеш вет.
Диана СЕМЕНОВА.
Марий Турек, Арбор.



Йошкар Упш мөнгыжö каяш тарванен. Сур пирылан логалде, корным ончыкто.


Вуйжо – шанык,
почшо – үштырвоштыр.
Мом ыштем – тудым ышта.
Күртнью ўшкыжем муш
почан.

Максим НИКОЛАЕВ.
Морко, Коркатово.

Руш мут-влаклан мужырым муза.

Телёнок	Шорык
Корова	Кавун
Овца	Нулго
Коза	Куэ
Тыква	Презе
Берёза	Ушкар
Пихта	Каза

85 Милена
МАКАРОВА.
Одо кундем,
Алнаш, Маскиял.



Кум шыртым вашталтен, ныл
треугольничкым ыштыза.

Таче Тымапий
Танаксолашке
толын. Тушто турслёт
тўналын. Тунемше-влак
турслётышто тумам тарвате-
ныт. Томаша! Тымапийын
тувыржо туржалтше. Ту-
ныктышо тептердыме Ты-
мапийым титаклыш. Тудо
тургыжлана.

**У Торъял школын
юнкор кружокшо.**



10 ойыртемын му.



Индекс: Марий Элыште,
Пошкырт ден Татарстан
кундемлаште - П4696.
Тираж 1000 экз. Заказ 216.
Формат – А-4-8.
Директор-тўн редактор
Л.В.СЕМЕНОВА.

E-mail: yamde_lii@mari-el.ru,
yamde_lii@mail.ru
Сайтын адресше: yamde-lii.ru,
Тел. 45-25-49(факс);
45-22-82.

УЧРЕДИТЕЛЬ-ВЛАК:

Марий Эл Республикысе
культур, печать да калык-
влакын пашашт шотышто
министерстве, «Ямде лий»
газет» кугыжаныш унитар-
ный казенный предприятий.

Газетым Массовый коммуникаций сфериште да культур наследийым аралымыште законодательством шуктен шогымым эскерыше Федеральный службын Приволжский федеральный округысо управленийыштыже регистрироватлыме.
Номер – ПИ №ФС 18-1999,
2005 йи 10 февральыште пуымо.

0+

Соцсетъысе адрес-влак:
ok.ru/yamdellii
vk.com/yamde_lii

Авторын да редакцийын шон-
намашышт түрлö лийын кер-
тыт. Серыш-влак мөнгеш огыт
колталт.

Ак – кутырен келшыме
почеш.

Газетым редакцийыште погымо да верстатлыме, «СТРИНГ» ИПФ
ООО-што ямде оригинал-макет гыч савыктыме. Типографийын
адресше: 424006, Йошкар-Ола, Строитель урем, 95.

Редакцийын да издательын
адресше: 424006, Йошкар-Ола,
СССР Вооружённый Вийын
70-ше идалыкысе урем, 20.